


TEZAUUR LITURGIC
16 NOIEMBRIE

ACATISTUL
SF. APOSTOL
ȘI
EVANGHELIST
MATEI



MOSCOVA, 2000



Акафист апостолу и евангелисту МАТФЕЮ

КОНДАК 1

Избранный от мытарства на ученичество Слову Собезначальному, боговидче Матфее всеблаженне, призвание приял еси от всемирнаго Света вселенныя концы просвещати и Божественное Евангелие сподобился еси написати нам во утверждение, да, внемлюще словесем благовестия твоего, прославим Всесвятаго Бога; сего ради велегласными усты приносим тебе песнь похвальную: Радуйся, святой апостоле и евангелисте -Матфее, благовестия Христова проповедниче.

ИКОС 1

Ангелов лик и человеческий род приносят тебе ныне хвалебное приношение, божественный апостоле, яко, смущения мятежнаго отшед, Христу последовал еси, егда возгласи тебе Господь: «По Мне гряди». И нас, немощных,

утверди к Царствию Небесному, тебе вопиющих
сице:

Радуйся, от мытницы Христом призванный.

Радуйся, на апостольское служение избранный.

Радуйся, богатство мира сего презревший.

Радуйся, Небеснаго сокровища стяжателю
усердный.

Радуйся, Евангельския истины пламенный
ревнителю.

Радуйся, глаголов жизни вечныя немолчный
возвестителю.

Радуйся, слова Христова, яко сокровище, в
сердце слагавший.

Радуйся, о Христе усердно благовествовавший.

Радуйся, святой апостоле и евангелисте
Матфее, благовестия Христова проповедниче.

КОНДАК 2

Видя, богомудре, радость народа
богоизбраннаго во граде твоём, егда исцели
Иисус расслаблена жилами и грехов отпущение
дарова тому, возжелал еси последовати Христу,
от мытницы призванный, чая и своих грехов

очищения, вкúпе со всеми прославляя Бога, поюще Ему: Аллилуия.

ИКОС 2

Разум человеческий не возмóже вместити радости твоея, боговídче, егда во граде Капернаúме узрел еси Мессию Иисуса, призвавшаго тя от служения кéсарю ко служению Богу, вместо богатства тленного нетленное дáруя; сего ради воспеваем ти сицевáя:

Радуйся, града Капернаúма славное прозябéние.

Радуйся, неверующих во Христа посрамление.

Радуйся, служение кéсарю отложívый.

Радуйся, сердце Царю Небесному прилепívый.

Радуйся, грешным звездо просвещения.

Радуйся, кающимся верное наставление.

Радуйся, Христовою благодатию в сердце уязвленный.

Радуйся, к сонму двана́десяти апостолов сопричтénный.

Радуйся, святы́й апостоле и евангелисте Матфее, благовестия Христова проповедниче.

КОНДАК 3

Сила Вышняго положи на сердце твое, апостоле Матфее, еже прияти Христа в дому твоем со ученики Его, сего ради трапезу уготовав, призвал еси други твоя, мытари и грешники, да познают вси Истиннаго Милующаго Бога, воспевающе: Аллилуия.

ИКОС 3

Имуще не по разуму ревность, фарисеи глаголаху учеником Христовым: «Почто с мытари и грешники Учитель ваш яст и пиет?» Не разумеваху бо, сердцам их ожесточившимся, яко прииде Господь к тебе, избранне, еже призвати грешников на покаяние и милость Божию возвестити, явльшуюся во исцеление немощей наших. Сие бо и проповедал еси миру, подвизая пети тебе таковая:

Радуйся, Христа в дому твоем приявый.

Радуйся, любовь Божию себе стяжавый.

Радуйся, о благостыни Христове сладкое вещание.

Радуйся, веры святыя благоухание.

Радуйся, покаяния велегласный проповедниче.
Радуйся, Божия милости неложный
провозвестниче.

Радуйся, зна́мения времён уразумевый.
Радуйся, неизречённых тайнниче
богодухновенный.

Радуйся, святой апостоле и евангелисте
Матфее, благовестия Христова проповедниче.

КОНДАК 4

Бурю смятений зряше Христос в народе Своем,
людие бо расточёни бяху, яко овцы, не имущи
пастыря, темже призва тя, блаженне Матфее, с
прочими ученики Своими, даде власть на дусех
нечистых, изгоняти их, и исцеляти всяк недуг и
всяку болезнь в людех, на-учающе пети всех:
Аллилуия.

ИКОС 4

Слышав глагол Христов: «Жа́тва убо мно́га,
де́лателей же мало», — воспыла́л еси ревностию
яже по Бозе, боголю́бче, путь твой устрояя ко
овца́м погибшим до́му Израи-лева, проповедал
еси покаяние, прибли́жися бо Ца́рство Небе́сное.

Мы же, воспевающе труды твоя и болезни, зываем ти, сице:

Радуйся, насадителю истинного богочитания.

Радуйся, образе на Христа неложного упования.

Радуйся, силу многу от Христа уллучивый.

Радуйся, послушание Богу в себе явивый.

Радуйся, болезни именем Хрис-товым исцеляяй.

Радуйся, всем в нуждах помощь подаваяй.

Радуйся, Истинного Бога служителю.

Радуйся, бесов прогонителю.

Радуйся, святой апостоле и евангелисте Матфее, благовестия Христова проповедниче.

КОНДАК 5

Боготечный источник был еси, Матфее апостоле, егда от Хрис-та, Бога и Учителя твоего, приял еси дары многи чудотворения, утверждая искренния твоя в вере в Сына Человеческаго, научающе пети Тому: Аллилуия.

ИКОС 5

Видевше тя людие, чудеса творяща о имени Господни, благовес-тителю святыи, с радостию -вѣлиею приимаху в домех своих яко человека Божия, ты же, по слову Христову, привѣтствовал еси тех, глаголя: «Мир дому сему!» Днесь бо и нас посети целованием твоим, блаженне, тебе приносящих таковая:

Радуйся, дару Божию тезоименитый.

Радуйся, апостоле Христов великий.

Радуйся, мира Вышняго прис-ный подателю.

Радуйся, Евангелия Христова изрядный сказателю.

Радуйся, чудотворением землю озаривый.

Радуйся, еже любити Бога верных научивый.

Радуйся, яко и дуси повиновахуся ти.

Радуйся, яко имя твое написася на Небеси.

Радуйся, святыи апостоле и евангелисте Матфее, благовестия Христова проповедниче.

КОНДАК 6

Проповедающе Христу, рече некий Ему: «Се, Мати Твоя и братия Твоя вне стоят, хотяще глаголати Тебе». Он же отвещав, рече: «Иже бо

а́ще сотвори́т волю́ Отца́ Моего́, той бра́т Мой и ма́ти Ми е́сть». Возрадо́вался еси́ глаго́лом сим, Ма́тфее, сродни́ком возже́ла́в быти́ Госпо́ду, разу́мение прия́в Божию́ то́кмо волю́ творити́ в житии́ своем, непреста́нно воспе́вая: Аллилу́ия.

ИКОС 6

Возсия́вый чуде́сы́ многими́, Боже́ственный Учи́тель наш, недоуме́ваю́щу ти, апосто́ле, нача́т ска́зовати́ учени́ком Свои́м, яко́ подобает́ Ему́ мно́го постра́дати, и уби́ену́ быти́, и в тре́тий де́нь воста́ти. Не разу́мев, како́ будут́ сия́, сла́гал еси́ в се́рдцы́ тво́ем вся́ слова́ Госпо́дня; мы́ же, взира́юще на чи́стоту́ ве́ры тво́ея, дерза́ем зва́ти тебе́ та́ковая:

Ра́дуйся, изъя́вителью́ му́дрости Учи́теля Боже́ственна́го.

Ра́дуйся, слуго́ сми́ренный Гос-пода́.

Ра́дуйся, Спа́совых глаго́лов усер́дный храни́телю.

Ра́дуйся, таи́н ве́ры богоза́ре́нный изъясни́телю.

Ра́дуйся, и́мя Христо́во на зе́млі́ возвели́чивый.

Ра́дуйся, Еванге́лие во все́ленней утве́рдивый.

Радуйся, Слова Божия служителю.
Радуйся, Господу подражания учителю.
Радуйся, святой апостоле и евангелисте
Матфее, благовестия Христова проповедниче.

КОНДАК 7

Хотя явити себе Иисус яко Хрис-та Божия,
всѣде на ослѣ и вниде во Иерусалим; ты же,
духонѣсне Матфее, купно со всеми рѣзал еси
вѣтви от дров и постигал еси по пути, взывая:
«Осанна Сыну Давидову! Благословен Грядый во
имя Господне! Аллилуия!»

ИКОС 7

Новаго таинства свидетель был еси, боголюбче,
егда на Вѣчери хлеб преломив Иисус, рече: «Сие
есть Тело Мое», — и прием чашу, даде ю, глаголя:
«Сия есть Кровь Моя». Сего истиннаго Брашна и
Пития истиннаго вкупе с тобою и всеми
верными ученики и мы дерзающе причащатися,
воспеваем ти сице:

Радуйся, Господни славы яснозрителю.
Радуйся, Иисуса, Сына Давидова,
дерзновенный возвестителю.

Радуйся, Тайней Вечери Хрис-том
приобщенный.

Радуйся, Духом Божиим озаренный.

Радуйся, заповедем Божиим нас научающий.

Радуйся, ко блаженству Христову всех
призывающий.

Радуйся, ко Причастию дерзающих
укрепителю.

Радуйся, молитвенниче наш и покровителю.

Радуйся, святой апостоле и евангелисте
Матфее, благовестия Христова проповедниче.

КОНДАК 8

Странно явился тебе, богомудре Матфее,
судище незаконное, распятие, смерть и
погребение Господа твоего и Учителя. Того
уязвлен словесы и воскресения чая, мысленне
взывал еси: Аллилуия.

ИКОС 8

Весь исполнен быв радости, всехвальне, внегда
узрети ти Воскресшаго Господа твоего и
поклониться Ему, пасхальное целование дал еси
апостолом, глаголя: «Воистину воскресе

Христос!» Мы же, ликующе с тобою вкупе,
приносим тебе таковая:

Радуйся, Господни Страсти яве изложивый.

Радуйся, цену спасения нашего открывый.

Радуйся, видением Воскресшаго почтенный.

Радуйся, в вере Богом твердо утвержденный.

Радуйся, Христова воскресения
благовестителю.

Радуйся, во тьме неверия сидящих
просветителю.

Радуйся, верный учителю истинного
богохваления.

Радуйся, наставниче добрый Богу
благодарения.

Радуйся, святой апостоле и евангелисте
Матфее, благовестия Христова проповедниче.

КОНДАК 9

Всякое отмета́я сомнение, Матфее богомудре,
со апостолы стопы́ своя направил еси в го́ру,
аможе повелé Иисус, и виде́в, поклонился еси
Господу, прием убо от Него повеление:
научающе, проповедати всем язы́ком и
крестя́ще их во имя Отца и Сына и Святаго

Духа, соблюдать вся заповеди Божия, поя немолчно: Аллилуия.

ИКОС 9

Ветія Божественный, богогласне Матфее, видя Христа от земли на Небо восходяща, возрадовался еси, обетованию Спасову внимая: «Аз с вами есмь во вся дни, до скончания века!» Мы же, зряще в житии твоём исполнение глаголов Божиих, верно вопием сицевая:

Радуйся, сомнение о Христе поправый.

Радуйся, от Премудрости мудрость приявый.

Радуйся, во имя Святыя Троицы крестителю.

Радуйся, верный заповедей исполнителю.

Радуйся, Христу последовавый верно.

Радуйся, вознесением Господним в вере и надежде утверждённый.

Радуйся, глаголов Спасовых рачителю.

Радуйся, премудрый истины хранителю.

Радуйся, святой апостоле и евангелисте Матфее, благовестия Христова проповедниче.

КОНДАК 10

Спасительное Духа сияние в Сионстей горнице на тя сниде во огненне виде, боголюбче Матфее, от Негоже приял еси светлыя почести благодати, по обетованию Христову, юже раздал еси всем евангельски, мрак безбожия разоряя, научая в мире пети Богу: Аллилуия.

ИКОС 10

Стена и заступник явился еси Церкви Иерусалимстей, друже Христов, благовестие Господне писмены изложил еси еврейски, яко самовидец быв и слуга возсиявшаго Слова; мы же, имуще кийждо на свой язык преложшееся Евангелие, тобою написанное, воспеваем ти сице:

Радуйся, благодати Божия приятелище.

Радуйся, Духа Святаго обиталище.

Радуйся, от Господа жребий апостольства улучивый.

Радуйся, догматы Христовы в Евангелии изложивый.

Радуйся, Церковь Иерусалимскую в вере соблюдыи.

Радуйся, Словом Божиим, яко мánною, óную пита́вый.

Радуйся, Евангелия Христова усердный списáтелю.

Радуйся, учений Небесных благовещáнный сказа́телю.

Радуйся, святой апостоле и евангелисте Матфее, благовестия Христова проповедниче.

КОНДАК 11

Пение похвальное приносит ти Христова Церковь, святой Матфее, яко язык множество богоуправлени тобою бы́ша, егда оставив Святой град, Си́рию, Миди́ю, Перси́ду, Па́рфию и Ефио́пию просветил еси, научая воспевати всех Единому Истинному Богу: Аллилуия.

ИКОС 11

Свет невещéственный озари тя, апостоле, егда благоле́пнейшим венце́м десни́ца Вседержи́телева ты украси по кончине твоей мученичестей, со Ангелы ты предста́вшу Престолу Божию. Ныне ча́ющих предстательства

твоего не остави нас, грешными усты тебе приносящих сицевая:

Радуйся, веры Христовы насадителю.

Радуйся, церковей множества -зиждѣтелю.

Радуйся, чудесы твоими идолопоклонники удививый.

Радуйся, учением твоим неверныя во истинней вере утвердивый.

Радуйся, благовестниче веры Христовы усерднейший.

Радуйся, учителю Церкви Христовы изряднейший.

Радуйся, венцем мученическим увенчанный.

Радуйся, заступниче, нам Богом данный.

Радуйся, святой апостоле и евангелисте Матфее, благовестия Христова проповедниче.

КОНДАК 12

Благодать неистощимую яви нам Господь от мощей и святых икон твоих, богоглаголив Матфее, некогда бо чудотворив силою Христовою, тоюжде и доднесь всем потребная подаеши, подвизая дивному во святых Своих Богу пети: Аллилуия.

ИКОС 12

Поюще пресветлую твою память, Матфее апостоле, приснаго твоего предстательства просим, ты бо от мытницы призванный не постыдился еси мытарі и грешники призвати на пир Христов; и ныне не остави всех нас, управи к Царствию Небесному тебе приносящих таковая:

Радуйся, Евангелием Христовым нас просвещающий.

Радуйся, присное заступничество нам являющий.

Радуйся, о мытарех благоразумных присный молитвенниче.

Радуйся, образе христолюбивым золотоправцем и казнохранителем.

Радуйся, яко мощи твоя исцеления источают.

Радуйся, яко от икон твоих многа чудеса бывають.

Радуйся, яко тобою вера святая прославляется.

Радуйся, яко тобою Церковь Христова дивно красуется.

Радуйся, святы́й апостоле и евангелисте Матфее, благовестия Христова проповедниче.

КОНДАК 13

О всехвальны́й апостоле и евангелисте Матфее! Приими малое сие хваление наше и испроси нам у Милостиваго Спаса ревность ко исполнению Евангелия Христова, мир душевны́й и грехов очищение, яко да вни́ти и нам в радость Господа нашего и Троидиному Богу воспевати с тобою вку́пе во Царствии Небеснем: Аллилуия.

(Этот кондак читается трижды,
затем икос 1 и кондак 1)



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**